

«Miu cor» è sin Netflix

Quai n'hai probablmain anc mai dà enfin ussa – musica rumantscha cumpara en ina producziun internaziunala da Netflix. En la segunda stagiun da la seria «Warrior Nun» da la plattform da streaming americana è d'udir la chanzun «Miu cor» da la chantautura rumantscha Ursina.

RTR/FMR

Tgi che guarda l'emprima episoda da la segunda staffa da la seria «Warrior Nun» vegn forse ad esser surprais in mument. Ina vusch melodiosa rumantscha – numnadamain quella da la chantautura Ursina (*Ursina Giger*) – è d'udir en quella nova episoda. La scena: La mungia-guerriera, la «Warrior Nun», sa zuppa e lavura en ina bar si en las muntognas. Ed en quella bar è d'udir la chanzun dad Ursina.

Sia chanzun «Miu cor» è vegnida elegida dals producents da la seria per quest plaz prominent. En «Warrior Nun» è l'istorgia dad ina giuvna orfna munida cun forzas surnaturalas e che cumbatta en in'organisaziun secreta da la baselgia. E tge di la chantautura rumantscha dal fatg che sia chanzun cumpara en questa seria? – Ursina ha ditg en in'intervista cun RTR: «Jau hai sa chapescha grond plaschair che la firma da producziun ha prendì mia chanzun.»

«Igl è ina chanzun cun in lev beat, betg memia spert e betg memia plaun.»


Ursina,
chantautura

Tuttenina audan persunas la chanzun tut enturn il mund

Co èsi dentant vegnì a questa collavuraziun? Ursina ha explitgà en in'intervista: «Jau n'hai atgnamain betg fatg bler. Sur intgins chantuns

hai jau survegnì quella dumonda, ina simpla dumonda d'utilisar la chanzun. Igl è ina chanzun cun in lev beat, betg memia spert e betg memia plaun. Forsa è 'Miu cor' ina chanzun che dat ina bell'atmosfera, adattada per quella scena.»

Netflix è ina da las pli popularas paginas da streaming da films, serias e documentaziuns che cuntanscha milliuns da persunas mintga di. Suenter che la segunda staffa da «Warrior Nun» è ida online quest november, ha Ursina remarktà ch'i haja dà in augment d'auditurs sin ses profil da Spotify. Ella smina ch'igl è probabel che blers hajan duvrà «Shazam» per chattar sia musica. «Shazam» è in'applicaziun sin il telefonin ch'identifitgescha ina chanzun e ses interpret sin fundament d'ina registraziun. Plinavant ha Ursina constatà che las medias sajan vegnidas pli attentas sin sia musica e sin ella sco chantadura en general. Perquai di ella: «Jau poss ussa nizzegiar quella preschientscha per render attent a mia musica e pudair parter quella.»



Quest november è cumparida la segunda stagiun/staffa da la seria «Warrior Nun» sin Netflix.

FOTO MAD